



Press Release No. 12/195
FOR IMMEDIATE RELEASE
May 29, 2012

International Monetary Fund
Washington, D.C. 20431 USA

Izjava Misije MMF-a u Bosni i Hercegovini

Misija Međunarodnog monetarnog fonda (MMF) na čelu sa Costasom Christou, održala je razgovore sa organima vlasti u Bosni i Hercegovini u periodu od 16. do 29. maja/svibnja 2012. godine, koji su uključivali konsultacije prema Članu IV i razgovore o eventualnom novom aranžmanu koji bi mogao dobiti podršku MMF-a. Na kraju posjete, gosp. Christou je dao sljedeću izjavu:

“Nakon što je uspješno prebrodila početne efekte globalne finansijske krize, ekonomija BiH se suočava sa novim pritiscima. Oporavak, koji se počeo osjećati tokom 2010. godine, slabi zbog znakova da kriza u eurozoni negativno utiče na izvoz roba iz BiH i na priliv kapitala u BiH. Domaća potražnja je i dalje niska zbog fiskalnih ograničenja, stagnacije plata i sporog kreditnog rasta. Sa slabljenjem ekonomije trend inflacije je išao prema dole. Ne vidimo da će doći do rasta obima proizvodnje tokom 2012, a perspektive nakon 2012. su neizvjesne zbog kontinuirane neizvjesnosti u eurozoni i vlastitih slabosti Bosne i Hercegovine.

“Pozitivno je što je kontinuirana fiskalna suzdržanost pomogla da se deficit generalne vlade zadrži u okviru 3 procenta BDP-a tokom 2011., što predstavlja smanjenje u odnosu na 2010. godinu kada je deficit iznosio 4,2% BDP-a. Međutim, ovo je djelimično postignuto privremenim mjerama, dok je slabila koordinacija državnih politika i usporavao napredak u provođenju strukturalnih fiskalnih reformi. Očekuje se da će javne finansije ostati pod pritiskom tokom 2012. kako ekonomija bude slabila.

“Pozdravljamo perspektivu donošenja budžeta institucija BiH za 2012. godinu. Time će biti otklonjen element neizvjesnosti u planiranju budžeta, što će omogućiti entitetima da izvrše rebalans vlastitih budžeta i zasnuju ih na realnijim pretpostavkama poreznih prihoda i finansiranja. U postojećem okruženju, kontinuirana suzdržanost u rashodima je od ključnog značaja da bi se sačuvala stabilnost javnih finansija na svim nivoima vlasti. Mi apeliramo na vlade da krenu korak dalje od jednokratnih mjera štednje i da intenziviraju reforme u polju plata i zapošljavanja u javnom sektoru, boračkih naknada i sistema penzionog i zdravstvenog osiguranja.

“Bankarski sistem je dobro podnio efekte globalne finansijske krize. Sektor u cjelini je ponovo počeo ostvarivati profit tokom 2011. godine, a banke su nastavile ojačavati svoje kapitalne rezerve putem injekcija kapitala i zadržavanja dobiti. Depoziti stanovništva su značajno porasli. Međutim, nekvalitetni krediti koji su ponovo malo porasli u prvom kvartalu 2012. nakon znakova stabilizacije, djeluju kao smetnja kreditnom rastu. Ovim su posebno pogođeni krediti privatnom sektoru, kojeg stalno potiskuju velike potrebe vlade za finansiranjem a koje se sve više zadovoljavaju zaduživanjem kod banaka.

“Također smo pokrenuli razgovore o programu koji bi mogao podržati MMF. Organi vlasti su izrazili predanost programu koji bi pružio okvir za politike koje će osigurati makroekonomsku stabilnost, podržati intenziviranje napora da se ostvari napredak u provođenju nezavršenih reformi i pomoći BiH da pokrije svoje potrebe za inostranim finansiranjem. Misija je spremna da se vrati u BiH u narednim sedmicama da bi nastavila pregovore o programu. U međuvremenu, organi vlasti su se obavezali da će razraditi jasnu zajedničku ekonomsku strategiju, složiti se o ciljevima politika i identifikovati korake za provedbu neophodnih reformi.”